

## Tarangüch wüx nawiig aaga nanderac cam müjndiw nipilan judío HEBREOS

### *Teat Dios tandeac wüx Teat Cristo*

<sup>1</sup> Teat Dios tanomb tandeac xeyay, tayamb nguineay masaj mondeac andeac nej (profetas) nguineay alndom masajüw mixejchiiüts palpálwüx poch leaw andiüm masaj nejiw.

<sup>2</sup> Nganüy wüx aaga nüt cam Teat Dios tüüch miün Micual Nej mandeac masaj icoots. Tüüch Micual Nej marang meáwan ocas, nüt, at a iüt cam; ndoj tacueat teowix nej meáwan leaw almajlüy.

<sup>3</sup> Micual nej ajlüy najneajay, atanej Teat Dios cos Dios nej aton; cuajantanej alndom marang. Wüx áagan andeac nej teamajiür meáwan leaw tarang, ngo ndrom ombas nicuajind. Wüx landoj mawün meáwan asoetiiüts, quiaj tamb andüy cawüx tiül cielo chetem amb wüx miác Teat Dios.

### *Micual Teat Dios natang, ángeles chingüyw*

<sup>4</sup> Micual Teat Dios natang, nganüy meáwan ángeles chingüyw, ngo matüchiw. Minüt nej micual Teat Dios nembeat xeyay. <sup>5</sup> Cos Teat Dios ngo masaj nejingüind ángel:

Ique Xecual ic;

nganüy lanajüiquich xique miteat, aj.

At ngo mandeac wüx nejingüind ángel:

Xique sanajlüy miteat nej,

nej apmajlüy xecual, aj.

<sup>6</sup> Pero wüx Teat Dios tüüch miün anopúyan Micual nej ningüy wüx a iüt cam, quiaj tasaj meáwan miángeles nej:

Irangan nej casa, aj.

<sup>7</sup> Teat Dios tandec wüx miángeles nej wüx tapiüng: Tarangasüw majlüyiw atnej nepepep, aton tarangas majlüyiw atnej oniw biümb, aw.

<sup>8</sup> Pero wüx Teat Dios tandec wüx Micual Nej, tapiüng:

Ique Dios, apchetemear wüx aaga najneajay chetejeran wüx meáwan nüt;

apmejlüy wüx meáwan leaw almajlüy.

Ique najneajay apmejaw wüx cuajantanej wüx apmeyer minajiüt.

<sup>9</sup> Ique palüy indiüm leawa najneaj, ijcüy mejaw meáwan leawa ngo majneaj;

pares Teat Dios, aaga naleaing Midios, lamüüch ic mapac imeaats mejlüy natang,

mejntsop wüx iquiüjpüw, aw.

<sup>10</sup> Aton Teat Dios tasaj Micual Nej:

Teat, ique ombas terang a iüt cam wüx nganaw majlüy nicuajind,

Terang nüt, caaw, at ocas naag iwix.

<sup>11</sup> Meáwan ajcüw ayaj apndrom ombas,

pero ique tan ijlüy ngo ndrom imbas.

Ajcüw ayaj apmataxeyiw atnej noic napixeran;

<sup>12</sup> ajcüw ayaj apmembiül melox ninguiün atnej ngarrats napixeran,

apmengowüüch majlüy jayats.

Pero ique tan iriümb meáwan nüt,

mineat ngondom mümb, aj.

<sup>13</sup> Teat Dios ngo masaj nejinguid ángele:

Cheter ningüy wüx xeác,  
leaw sanayac meáwan moncüy majaw ic ma-  
jmiücüw tileaj, maj.

<sup>14</sup> Pero meáwan ángeles mimonrang minajiüt Teat Dios, tñjndiw miünüw mambeolüw nipilan leaw apmawüw wüx asoetiw nejw.

## 2

### *Aaga leaw tawün icoots wüx, nembeat xeyay*

<sup>1</sup> Pares nganüy netam mayacaats wüx omeajtsaats leawa lamanguiyiiüts, nganandot macueatiiüts mandüjpiiüts. <sup>2</sup> Cos sitiül aljane ngo marang aaga nembeat poch leaw nomb Teat Dios tüüch mandeacüw miángeles nej, sitiül jane ayaag ngo metam marangüch palan aaga poch quiaj, nej apmüünd mamongochiw xeyay ngo majnej. <sup>3</sup> ¡Cuantemás icoots nganüy apmamongochiiiüts xeyay ngo majnej sitiül ngo mayacaats wüx omeajtsaats aaga najnejay leawa tarang Teat Cristo para mawün icoots wüx meáwan asoetiiüts! Aag ayaj Teat Jesús ombas mandeac nguineay apmarang, condom ajcüwa leawa tanguiyiw andeac nej tajawüw aag ayaj naleaing, ndoj tasajüw icoots. <sup>4</sup> Teat Dios aton tajüiquich aag ayaj naleaing, cos tüüch majaraw cuajantanej; tüüch apóstoles ndom ombasüw marangüw xeyay cuajantanej ateócan. Tambeol nejw Nangaj Espíritu ocueaj Teat Dios cos tüüch ndom marangüw cuajantanej najiüt leaw andiüm nej.

*Jesucristo tajlüy atnej nipilan*

<sup>5</sup> Teat Dios ngome apmayac ángeles majlüyiw wüx a iüt cam alinoic nüt wüx apmarang aaga jayats iüt leawa teamandeacaats wüx. <sup>6</sup> Tiül aaga ajlüyay Mipoch Teat Dios aljane tapiüng:

¿Cuane nej nipilan ndom leam imeaats wüxe?

¿Neol indiüm membeol micual nipilana?

<sup>7</sup> Ique Teat Dios, acásan nüt teyac nipilan majlüy chingüy, pero teyac ángeles majlüyiw natang.

Condom teaach nipilan majlüy natang wüx a iüt cam, marangüch casa;

teaach majlüy wüx meáwan leaw lamerang;

<sup>8</sup> lango majlüy nicuajind leaw ngo meyac majlüy teoleaj nej, aw.

Teaach nipilan majlüy wüx meáwan leaw almajlüy, nicuajind ngo majlüy leaw ngondom majlüy wüx. Pero nganaw majawaats nipilan majlüyiw wüx meáwan leaw almajlüy. <sup>9</sup> Pero ajawaats Teat Jesús, acas nüt tajlüy chingüy, wüx ángeles tajlüyiw natang. Condom Teat Jesús tajlüy natang, marangüch casa; cos Teat Dios tandiüm müüch nej mamongoch xeyay ngo majneaj wüx tandeow mawün wüx asoet meáwan nipilan.

<sup>10</sup> Cos Teat Dios tarang meáwan leaw almajlüy, nganüy netam marangüch meáwan leaw andiüm nej. Nej andiüm xeyay micual nej mambüw tiül cielo, áag tüüch Teat Jesús mamongoch xeyay ngo majneaj. Nej tarang palan leaw andiüm Teat Dios, cos atquiaj alndom mawün nejiw wüx asoetiw.

<sup>11</sup> Teat Jesús tapaj nipilan majlüyiw ocueaj nej, aton ajcüw leawa tajpaj majlüyiw nóiquian, cos nop miteatiw; pares Micual Teat Dios ngo maxing

masajüw micojow michijquiaw nej. <sup>12</sup> Cos nomb tapiüng:

Sanasajüw xecojow xechijquiaw jane ic Teat Dios. Niüng canchiüjow, quiaj sanataag cantar najneajay wüx ique, aw.

<sup>13</sup> Aton tapiüng:

Xique sanayac ximeaats wüx nej, aw.

Alinomb tapiüng:

Jogüy xic, salnaquiüjpüw meáwan xecualüw leaw Teat Dios lamüüch xic, aw.

<sup>14</sup> Cos nacualaran ajiürüw quiej, ajiürüw cuerpo, Teat Jesús aton tajiür cuerpo, at tajiür quiej cos nipilan newiquiach nej. Nej tandeow para mandrooch ombas aaga minatangüw nimeech nasoic diablo, cos nej neyac mandeowaran tiül nipilan.

<sup>15</sup> Teat Jesús tandeow mawün imbol mandeowüw nipilan, cos meáwan nüt nipilan imboloj mandeowüw. <sup>16</sup> Aag agüy naleaing, cos Teat Cristo ngome tiün mambeol ángeles, tiün mambeol acualaats Abraham. <sup>17</sup> Pares Teat Jesús tiün majlüy nipilan nej, mayaag atnej ayaag nipilan, cos atquiaj alndom marang najneaj natang miteaats leaw ajiür lasta nipilan wüx arang leaw Teat Dios tüüch nej marang. Teat Jesús nejay tarang nichech, mawün wüx asoetiw nipilan. <sup>18</sup> Cos nej tamongoch xeyay ngo majneaj, tayacüch wüx naél. Pares nganüy alndom mambeol leaw teyacüch wüx majiür naél.

### 3

#### *Teat Jesús natang, Moisés chingüy*

<sup>1</sup> Xecojow xechijquiaw, Teat Dios lamawün isoetiün, lamapaj icon mendüjpiün nej; nganüy ich

leam imeajtsan wüx Teat Cristo Jesús, cos Teat Dios tüüch nej miün marang minatang miteaats ocueajiiüts. <sup>2</sup> Nej tarang meáwan palan leawa tüüch nej Teat Dios marang, atnej tarang tanomb teat Moisés wüx tarang minajiüt Teat Dios, cos nej aton tarang palan tiül minipilan Teat Dios. <sup>3</sup> Nganüy Teat Jesús xeyay netam marangüch casa, ngo matnej teat Moisés, cos atnej nop nerang iüm más netam ajlüy, ngo matnej aaga iüm leawa tarang. <sup>4</sup> Cos meáwan iüm arang nej nipilan, pero leawa nerang meáwan leaw almajlüy, aag ayaj Teat Dios. <sup>5</sup> Naleaing teat Moisés tarang najneaj tiül meáwan monrang minajiüt Teat Dios. Meáwan najiüt leaw tarang, aag ayaj apiüng wüx leaw aliüc miün apmanderac alinoic nüt. <sup>6</sup> Pero Teat Cristo ajlüy wüx minipilan Teat Dios atnej nop natang nacualaran ajlüy wüx aniüng nej. Aaga aniüng nej quiaj apiüng wüx icootsa. Netam tanaámb mandüjpiiüts, aton macüliiüts nde apac omeajtsaats leawa Teat Dios lamapiüng aliüc miün apmajlüy.

### *Wüx axojtüw minipilan Teat Dios*

<sup>7</sup> Pares netam manguiayiiüts leaw apiüng Nangaj Espíritu ocueaj Teat Dios, cos apiüng:

Nganüy sitiül inguiayiün andeac Teat Dios,

<sup>8</sup> nde merangan adam imeajtsan matnej tarangüw tanomb mixejchiün,

cos nejiw ngo mayariw andeac Teat Dios, tujchiw majcüy wüx aliw tiül wajchiüc.

<sup>9</sup> Nejiw tujchiw xic najcüy xeyay, masey tajawüw nguineay tambeolasüw tiül ic miow (40) neat.

10 Wüx aag ayaj tajcüyiüs najawüw ajcüwa nipilan quiaj,

tapiüngas: “Mbójan ndroj omeajtsüw xic, ngo mayacüw wüx omeajtsüw marangüw leaw sandiüm”, saw.

11 Pares tajcüyiüs xeyay,

tapiüngas: “Langome sanüjchiw majmeliw maxojtütüw niüng sajlüy”, aw Teat Dios.

12 Ijawan xecojow xechijquiaw, nde majlüy nejingüind tiül icona mayac wüx omeaats ngo majneaj, mepiüangan ngo meyariün andeac Teat Dios, mecueatiün aaga Teat Dios almapac. 13 Ipajüw nop alinop meáwan nüt wúxan aliün majlüy nganüy nüt cam, ngana madam omeaats aljane tiül icona mapiüng arang najneaj masey arang ngo majneaj.

14 Apmajlüyüüts nóiquian maquiüjpaats Teat Cristo sitiül tanaámb apmandüjpiiüts atnej tarangaats wüx tayariiüts andeac nej.

15 Pares apiüng:

Nganüy sitiül inguiayiün andeac Teat Dios, nde madam imeajtsan matnej tarangüw tanomb mixejchiün,

wüx tujchiw majcüy Teat Dios, aw.

16 ¿Jane nejiw tanguiaiyiw andeac Teat Dios quiaj, condom ngo mayariw? ¿Ngome ajcüw ayaj meáwan leaw tawüw tiül Egipto, tawün nejiw teat Moisésa?

17 ¿Jane tajcüy majaw nejiw Teat Dios tiül aaga ic miow (40) neat quiaja? ¿Ngome ajcüw ayaja leaw tarangüw ngo majneaja, condom tandeowüw tiül wajchiüca? 18 ¿Jane nejiw tasaj nejiw Teat Dios niquimas ngondom majmeliw maxojtütüw niüng ajlüy neje? ¿Ngome ajcüw ayaja leaw ngo mayariw

andeac Teat Diosa? <sup>19</sup> Quiaj ajawaats nejiw ngon-dom majmeliw tiül aaga niüng apmaxojtűw, cos ngo mayariw andeac Teat Dios.

## 4

<sup>1</sup> Ata nganűy Teat Dios apiűng aliűn ndom müűch icoots maxojtaats niüng ajlűy nej. Pares ne-tam mejawan wűx leaw irangan, nganandot ngo metűchiűn. <sup>2</sup> Icoots aton nganűy lamasoiqiiűts aaga najneaj nanderac quiaj atnej tasoiquiw mix-ejchiiűts, ndoj ngo mambeol nejiw nicuajind wűx tanguiayiw a poch quiaj, cos tanguiayiw, ngo mayariw. <sup>3</sup> Pero icootsa leawa lamayariiűts andeac Teat Dios, tajmeliűts maxojtaats niüng ajlűy Teat Dios. Wűx aag ayaj nej tapiűng:

Wűx tajcűyiűs tapiűngas,  
niqimás lango majmeliw maxojtűw niüng sax-ood, saw.

Atquiaj tapiűng Teat Dios cos minajiűt nej laűmb nde wűx tarang a iűt cam. <sup>4</sup> Aton tiül Mipoch Teat Dios andeac wűx nej taxood wűx ayaíw nűt, cos apiűng:

Teat Dios taxood wűx ayaíw (7) nűt, wűx landoj marang meáwan minajiűt nej, aw.

<sup>5</sup> Alinoic poch tapiűng:

Lango majmeliw niüng saxood, aw.

<sup>6</sup> Altiűl nejiw leaw ombas manguiayiw andeac Teat Dios nganaw majmeliw, cos ngo mandiűműw mandűjpiw Teat Dios. Nganűy aliűn ndom aljane majmel tiül niüng axood Teat Dios. <sup>7</sup> Teat Dios lamayac alinoic nűt, aag ayaj nganűy cam. Cos atquiaj tapiűng Rey David, lamajiűr xeyay neat, tapiűng:



Sitiül nganüy inguiayiün andeac Teat Dios, nde madam imeajtsan, aw.

<sup>8</sup> Ndot teat Josué müüch maxojtűw nipilan Israel tiül niüng alndom maxojtűw, quiaj Teat Dios ngo metam mapiüng alinomb netam maxojtűw.

<sup>9</sup> Cos ngo maxojtűw ninguiün nüt, pares Teat Dios nganüy andiüm müüch maxood minipilan nej atnej nej axood. <sup>10</sup> Meáwan leaw laxood niüng axood Teat Dios, at aton laxood wűx cuajantanej najiüt arang, atnej Teat Dios taxood wűx landoj marang minajiüt nej. <sup>11</sup> Netam marangaats leaw alndom, maxojtaats niüng axood Teat Dios, ngana marangaats atnej tarangűw leaw nomb ngo mayariw andeac Teat Dios, ndoj ngome tajmeliw niüng apmaxojtűw.

<sup>12</sup> Mipoch Teat Dios almapac, alndom marang cuajantanej. Aaga Mipoch nej alndom majmel tiül omeaatsaran atnej nots espada nexing necamb necamb; alndom matűch tiül omeaats nipilan müüch mayajcűw nguineay ajlűy tiül omeaatsaran. <sup>13</sup> Meáwan leaw Teat Dios tarang, nej teamajaw nguineay ajlűy. Naleaing meáwan leawa almajlűy, ranűy majaw Teat Dios, ngo mexotűy nicuajind. Netam masajaats Teat Dios nguineay tarangaats.

### *Teat Jesús minatang miteaats*

<sup>14</sup> Icoots ajiűraats nop minatang miteaats, aaga laám̄b tiül cielo. Aag ayaj Teat Jesús micual Teat Dios. Netam mesapayoots nandand wűx andeac nej leawa lamayariiűts. <sup>15</sup> Cos aaga minatang miteaats ajiűraats quiaj, ajaw nguineay ayajcaats wűx amongochiiűts naél,

cos ajaw nguineay ajlüyiiüts. Masey nej aton tamogoch naél atnej amongochiiüts, pero nej ngo marang nicuajind ngo majneaj. <sup>16</sup> Pares alndom matüchiiüts niüng ajlüy Teat Dios, ngo metam mimbolaats, cos nej apmajiür icoots lasta, apmaxomaats mimonajneaj nej; apmambeol icoots wüx amongochiiüts cuajantanej naél.

## 5

<sup>1</sup> Meáwan natang miteaats narriüjtüch tiül nipilan, tajmel marang minajiüt Teat Dios mambeol nipilan mayac nichech, at mambiy nimal marang nichech mangüy asoeteran. <sup>2</sup> Cos meáwan natang miteaats nipilan nejiw, amongochiw naél atnej amongochiiüts. Pares alndom majiürüw lasta jane ngo majaw cuane arang, at leaw ajaw arang ngo majneaj. <sup>3</sup> Cos nipilánan nejiw, netam mayacüw ichechiw mawün nej asoetiw, aton netam mayacüw nichech mawün asoet meáwan nipilan.

<sup>4</sup> Nejinguid ngondom mapiüng apmarang natang miteaats, cos áag miün Teat Dios alndom mayac nop natang miteaats atnej tayac Aarón.

<sup>5</sup> Atquiaj Teat Cristo aton ngome nejáyan quiaj tapiüng apmarang natang miteaats, Teat Dios neyac nej, cos tasaj:

Ique Xecual,

nganüy lanüüch ic mejlüy nipilan ic, aj.

<sup>6</sup> Aton Teat Dios tapiüng:

Ique miteaats ic meáwan nüt,

atnej tanomb wüx tarang miteaats Melquisedec,  
aw.

<sup>7</sup> Teat Cristo wüx tajlüy ningüy wüx iüt tatün xeyay, tajiünts masaj Teat Dios, aaga alndom mambeol

nej ngo mandeow. Teat Dios tanguiy nej andeac cos nej tandiüm marang leaw Teat Dios apiüng. <sup>8</sup>Masey Micual Teat Dios nej, pero netam mamongoch naél, cos atquiaj tajaw nguineay ayajcüw nipilan, at nguineay netam marangüch leaw andiüm Teat Dios. <sup>9</sup> Cos landoj mamongoch aaga xeyay naél quiaj; quiaj meáwan nüt alndom mawün wüx asoeteran jangantanej nipilan leaw apmayar nej andeac. <sup>10</sup> Quiaj Teat Dios tayac nej marang minatang miteaats atnej tarang Melquisedec.

### *Nde ndrom imeajtsan Mipoch Teat Dios*

<sup>11</sup> Wüx aag ayaj aliün najiür xeyay sandiüm nasaj icon; aag ayaj naél, pero ngondom nasaj icon najen cos icona nequiy menguiayiün. <sup>12</sup> Cos lamajiür xeyay nüt mendüjpiün Teat Cristo, pares lajneaj merquiajchiün; nganüy icona netam mequiaacharanan wüx leaw ngo maél tiül Mipoch Teat Dios. Ijlüyiün atnej nop lambiniow nine tealeámban achech, nganaw müet nüeteran. <sup>13</sup> Jangantanej leawa tealeámban achech ajlüy atnej nop nine, cos nganaw majaw nguineay aquiaach aaga poch leaw apiüng cuane najneaj cuane ngo majneaj. <sup>14</sup> Cos nipilan wüx latang alndom müet cuajantanej nüeteran. Aag ayaj apiüng wüx nipilan leaw ayacüw wüx omeajtsüw marangüw leaw apiüng Teat Dios, cos atquiaj apmajawüw cuane najneaj cuane ngo majneaj.

## 6

<sup>1</sup> Pares lango nasaj icon alinomb leaw landoj mesoiquiün wüx Teat Cristo. Nganüy netam matangaats wüx Mipoch Teat Dios; ngo

metam mequiaachayoots wüx nguineay netam macueatiüts marangaats ngo majneaj, nguineay netam mayariiüts andeac Teat Dios. Meáwan aag ayaj lanasaj icon xeyay. <sup>2</sup> Lango nasaj icon alinomb netam meyariün yow, tengwüy nguineay netam mayacüch owixeran wüx omalaran. Aton ngo nasaj icon wüx apacaran tiül mondeow, at wüx Teat Dios apmajaw wüx asoeteran alinoic nüt. Cos meáwan aag ayaj lanaquiaach icon wüx. <sup>3</sup> Sitiül Teat Dios andiüm, nganüy sanasaj icon nguineay netam matangaats wüx Mipoch Teat Dios.

<sup>4</sup> Meáwan leawa lamajawüw ranüy leaw apiüng tiül Mipoch Teat Dios, lamayariw aag imiün tiül cielo, lamüjndiw Nangaj Espíritu ocueaj Teat Dios, <sup>5</sup> sitiül tayajcüw najneaj aaga andeac Teat Dios, at lamayariw nguineay apmarang Teat Dios alinoic nüt; <sup>6</sup> sitiül ajcüw ayaj apmacueatiw mandüjpiw Mipoch Teat Dios, lango ndom leaam omeajtsüw mandüjpiw Teat Cristo alinomb, cos aag ayaj atnej ayacüw Teat Cristo wüx cruz alinomb müjchiw mamongoch monxing. <sup>7</sup> Ajcüw ayaj ajlüyiw atnej nacats iüt niüng ajoet najneaj, cos sitiül aag iüt quiaj apmayac najneaj leaw apiürüch tiül, at monpiür alcuane apmaxaingiw müetiwi, quiaj ajüic Teat Dios tambeol majlüy aag ayaj. <sup>8</sup> Pero sitiül noic iüt palüy sats ayac, at cualsoj ajlüy tiül, aaga iüt ngo metam nicuajind, ngo majneaj apmanderac wüx. Ndójjwüx apmambeliw leaw altiül.

*Leaw teamacüliiüts ambeol icoots mandüjpiiüts Teat Cristo*

<sup>9</sup> Xecojow xechijquiaw leaw xeyay sandiüm, masey atquiaj sandeacan, sapiüngan icona atnej aaga iüt terangüy, tanaámb apmerangan najnej; aag ayaj ajüic leriowan wüx isoetiün. <sup>10</sup> Cos Teat Dios najnej arang, ngo ndrom omeaats nguineay teamerangan, nguineay tanaámb membeolan meáwan mondüüb Teat Cristo. <sup>11</sup> Sandiüman inopnopen tanaámb mepacan wüx mendüjpiün Teat Cristo, cos wüx irangan aag ayaj, quiaj apmeajndiün leawa temecüliün wüx ümb minütiün ningüy. <sup>12</sup> Nde meranchiün; irangan atnej arangüw ajcüwa mondüüb Teat Cristo con omeajtsüw, cos taiündüw wüx cuajantanej amongochiw, condom ayariw leaw Teat Dios lamapiüng apmüüch nejiw.

<sup>13</sup> Wüx Teat Dios tasaj Abraham cuane apmüüch nej alinoic nüt, quiaj nejáyan quiaj tandeac wüx minütan nej, cos ngo majlüy alinop natang atnej. <sup>14</sup> Quiaj Teat Dios tasaj Abraham: “Xique sanambeol ic xeyay, sanüüch ic mejiür xeyay icualaats”, aw. <sup>15</sup> Atquiaj Abraham, cos tacül, ngo paxiüm ocueaj, quiaj tüünd leawa lamasoic apmüünd. <sup>16</sup> Naleaing, tiül nipilan apajüw minüt nop más natang wüx ngo meyarayej andeacüw. Cos wüx andeacüw atquiaj, quiaj ajüic andeacüw naleaing, lango metam mandeacüw wüx más. <sup>17</sup> Wüx Teat Dios tandiüm majüiquich naleaing, nej ngondom mangowüüch leawa lamapiüng apmüüch acualaats Abraham, quiaj tandeac wüx minütan nej majüiquich naleaing apmarang leaw lamapiüng. <sup>18</sup> Cos Teat Dios tapiüng nguineay apmarang, tandeac wüx minüt nej, pares leaw

tandeaac ngondom mangowüüch, cos Teat Dios ngondom mawaiich. Nganüy icootsa leawa lajwanaats wüx asoetiiüts, Teat Dios teamambeol icoots ngo paxiüm macüliiüts aaga leaw nej lamapiüng apmüüch icoots alinoic nüt. <sup>19</sup> Nganüy aaga teamacüliiüts quiaj, aag ayaj üüch icoots majlüyüts nandand wüx mandüjpiiüts Teat Dios, atnej nop müx nandand ajlüy wüx ajiür micang müx masap nej. Wüx aaga leawa teamacüliiüts quiaj, alndom majmeliüts necamb aaga cortina tiül nangaj iüm tiül cielo; <sup>20</sup> niüng tajmel Teat Jesús, ombas nej, marang natang miteaats ocueajüts meáwan nüt atnej tarang Melquisedec.

## 7

### *Teat Jesús natang miteaats atnej tajlüy Melquisedec*

<sup>1</sup> Pues aaga Melquisedec quiaj minatang nena-jiüt tiül cambaj Salem, aton miteaats nej ocueaj Teat Dios najlüy tiül cielo. Aaga naxey quiaj taw mangoch Abraham wüx tapeay landoj ajntsop wüx montangtang monajiüt tiül montsoj. Quiaj aaga Melquisedec tasaj Abraham najneaj tarang, at tasaj Teat Dios mambeol nej. <sup>2</sup> Condom Abraham tüüch Melquisedec igajpowüw (1/10) awün tiül leaw axom tiül montsoj. Pues aaga minüt Melquisedec quiaj apiüng wüx najneaj natang nenajiüt tiül cambaj Salem; at tajiür alinoic minüt nej, aag ayaj natang nenajiüt nendondoch moncüy. <sup>3</sup> Aaga Melquisedec quiaj ngo majiür miteat nej, mimüm nej, mixeech nej; ngo majaraw nguineay tajlüy, nguineay tandeow. Nej tajüic

atnej Micual Teat Dios nej, apmarang miteaats meáwan nüt.

<sup>4</sup> Nganüy ijawan nguineay tarangüch casa aaga Melquisedec quiaj, cos mixejchiiüts Abraham tüüch nej igajpowüw naw tiül leaw taxom wüx tamb tiül montsoj. <sup>5</sup> Ajawaats meáwan micual Leví leaw monrang miteaats netam mayariw igajpowüw naw tiül leaw axom cambaj, cos atquiaj apiüng tiül aaga poch tüünd Moisés. Naleaing nejiw alndom mayariw aag ayaj ocueaj cambaj, masey micual nejiw Abraham aton. <sup>6</sup> Nganüy Melquisedec masey ngome naw tiül nejiw, nej tayar igajpowüw naw tiül leaw taxom Abraham, at tatün ocueaj Teat Dios mambeol nej, marang wüx leaw apiüng apmarang. <sup>7</sup> Wüx aag ayaj ajüic leaw atün mimonajneaj Teat Dios wüx alinop, nej ajlüy natang; pero aaga leaw neyar monajneaj ajlüy chingüy. <sup>8</sup> Naleaing nganüy aton miteaats ayariw igajpowüw naw tiül leaw axomüw nipilan, masey nipilan nejiw. Pero ninguiün nüt wüx tandec wüx Melquisedec, apiüng nej almapac ngo mandeow. <sup>9</sup> Ajawaats ajcüwa miteaats micual Leví aton tangüyw Melquisedec igajpowüw naw tiül leaw taxomüw, cos Abraham mixejchiw nejiw tangüy Melquisedec, masey nejiw nganaw majlüyw. <sup>10</sup> Cos wüx Melquisedec tamb mangoch Abraham, naleaing nejiw nganaw majlüyw. Masey nganaw majlüyw, tajlüy atnej tangüyw aton, cos apwijquiamoj tiül acualaats Abraham.

<sup>11</sup> Teat Dios tüüch nipilan israel aaga ajlüyay poch müüch majawüw nguineay miteaats netam marangüw wüx ayacüw ichechiw nejiw. Pero miteaats micual Leví ngondom mawün asoet nip-

ilan, pares netam majlüy alinop miteaats marang atnej tarang Melquisedec leaw ngome naw tiül micual Aarón. <sup>12</sup> Cos sitiül miteaats mbiüjlat, pues aaga ajlüyay poch tüünd Moisés aton netam mbiüjlam müünd alinop pálwüx miteaats marang minajiüt Teat Dios. <sup>13</sup> Aaga landerac wüx quiaj, aag ayaj Teat Cristo. Nej ngome naw tiül micual Leví, nej naw tiül micual Judá. Nejingund tiül ajcüw ayaj ngondom mayac nichech wüx artül. <sup>14</sup> Naleaing ajawaats nej Teat Cristo tajlüy naw tiül micual Judá; nganüy Moisés ngo mandeac wüx Judá nicuajind, ngo mapiüng aljane apmaw marang miteaats.

<sup>15</sup> Wüx aag ayaj ranüy majawaats, cos aaga jayats miteaats quiaj, apmajlüy atnej Melquisedec. <sup>16</sup> Aaga jayats miteaats quiaj tarang miteaats, cos niquimás ngondom ndrom ombas. Nej ngo marang miteaats atnej ajcüwa nipilan leaw tarangüw miteaats cos miteatiw nejiw tarangüw miteaats. <sup>17</sup> Atquiaj aton Teat Dios apiüng tiül Mipoch Nej:

Ique miteaats ic meáwan nüt,  
atnej tarang Melquisedec, aw.

<sup>18</sup> Quiaj ajüic aaga ajlüyay poch tüünd Moisés lango membeat nganüy, cos ngondom mawün asoet nipilan. <sup>19</sup> Atquiaj tajlüy, cos wüx aaga ajlüyay poch quiaj, nejingund ngondom maw wüx asoet nej. Nganüy ajlüy alinoic poch jayats, xeyay najneaj; wüx aag ayaj alndom matüchiiüts niüng ajlüy Teat Dios.

<sup>20</sup> Wüx aaga jayats poch quiaj, Teat Dios tandeac wüx minütan nej wüx tayac Teat Cristo marang



minatang miteaats. <sup>21</sup> Cos Teat Dios ngo mandeac wüx minüt nej wüx tayacüchiw ajlüyay miteaats; nganüy wüx Teat Jesús tarang miteaats, quiaj Teat Dios tandeac wüx minüt nej. Aag ayaj apiüng tiül Mipoch Dios:

Teat Dios tandeac wüx minüt nej, pares ngondom mambiülüüch andeac nej.

Nej tasaj Teat Cristo: “Ique apmerang miteaats meáwan nüt, atnej tarang Melquisedec”, aj.

<sup>22</sup> Pares nganüy ajiüraats noic poch najneajay, cos Teat Jesús, aaga najlüy wüx a poch quiaj, apmajlüy meáwan nüt. <sup>23</sup> Tajlüyiw xeyay miteaats; nganüy cos landeowüw, áag ngondom marangüw miteaats meáwan nüt. <sup>24</sup> Nganüy nej Teat Jesús, cos almaljüy meáwan nüt, pares alinop ngondom mayar aaga najiüt ocueaj nej. <sup>25</sup> Aton Teat Jesús alndom mawün wüx asoet meáwan nipilan leaw mondüüb Teat Dios. Cos nej almapac meáwan nüt, pares alndom matün ocueaj Teat Dios mambeol nejiw.

<sup>26</sup> Aaga natang miteaats ocueajiiüts quiaj, xeyay ajneaj, nangaj nej, nejinguind ngondom mayac nej asoet, cos ngo majiür nisoet nicuajind, ngo majlüy matnej meáwan nipilan. Aton tayacüch majlüy natang wüx meáwan najlüy tiül cielo. <sup>27</sup> Nej ngo metam ombas mambiy nimal mayac ichech nej majüiquich asoet nej, condom mayac ichech nipilan atnej arangüw ajcüw ajlüyay montangtang miteaats. Cos nejiw rawrráwan tiüt ombas mambiyaw nimal majüiquich maw asoetiw nejiw; condom ambiyaw nimal majüiquich maw asoet nipilan. Nganüy Teat Jesús teyacüy mandeow marang nichech mawün asoet nipilan. Aag

ayaj ngocháyan, ngo metam marangüch alinomb.  
<sup>28</sup> Tiül aaga poch tüünd Moisés apiüng jane ap-  
 marang minatang miteaats; cos ajcüw ayaj nip-  
 ilánan nejiw, ajiürüw nisoet aton. Condom wüx  
 Teat Dios tandeaç wüx minüt nej, tayac Micual  
 nej marang minatang miteaats, cos nej apmajlüy  
 palanüy meáwan nüt.

## 8

### *Teat Jesús ajlüy wüx noic jayats poch*

<sup>1</sup> Nganüy leaw xeyay netam mejawan, aag ayaj  
 wüx aaga minatang miteaats landoj nasaj icon  
 wüx. Cos nej alchetem amb wüx miác Teat Dios  
 tiül cielo niüng ajlüy xeyay najneaj. <sup>2</sup> Aaga mi-  
 natang miteaats quiaj arang minajiüt nej tiül aaga  
 najneajay nangaj iüm tiül cielo. Aaga nangaj iüm  
 quiaj, ngome nipilan nerang, Teat Dios nerang.  
<sup>3</sup> Pero meáwan minatang miteaats ningüy wüx iüt  
 ajmel mayac nichech, mambiy nimal para maw  
 nisoet. Nganüy aaga minatang miteaats tiül cielo  
 quiaj, netam majiür cuane mayac aton. <sup>4</sup> Nganüy  
 sitiül Teat Cristo majlüy ningüy wüx iüt, niquimas  
 ngondom marang miteaats, cos ajcüwa miteaats  
 najlüyiw ningüy wüx iüt ayacüw ichechiw nejiw  
 atnej apiüng tiül aaga poch tüünd Moisés. <sup>5</sup> Aaga  
 najiüt leaw arangüw ajcüwa miteaats ningüy wüx  
 iüt cam, aag ayaj apiüng wüx leawa najlüy tiül  
 cielo. Cos wüx Moisés tasoic nguineay apmarang  
 aaga nine nangaj iüm tiül wajchiüc miotaag nimal,  
 quiaj tasaj nej Teat Dios: “Irang meáwan atnej  
 tujchiüs ic mejaw wüx tiüc”, aj. <sup>6</sup> Pero minajiüt Teat  
 Cristo tiül cielo najntsop wüx ajneaj, ngo matnej

arangüw ajcüwa miteaats ningüy wüx iüt. Nej ajlüy wüx noic poch najntsop wüx ajneaj leawa tüünd Moisés, cos aaga poch leaw xeyay najneaj quiaj, apiüng wüx nguineay Teat Dios ajiür lasta nipilan mawün asoetiw nejiw.

<sup>7</sup> Sitiül aaga ombas majlüy poch tajlüy najneaj, quiaj lango metam marangüch amb ijquiaw poch.

<sup>8</sup> Pero Teat Dios tajaw ngome palan arangüw ajcüwa nipilan, cos ngo marangüw atnej apiüng tiül aaga poch quiaj. Quiaj tapiüng Teat Dios:

Aliüc miün nüt sanarang noic jayats poch naquiüjpüw nipilan monaw Israel, at nipilan monaw Judá.

<sup>9</sup> Aaga jayats poch quiaj, ngo matnej aaga poch tarangas naquiüjpüw mixejchiw nejiw wüx a nüt tawünasüw imiün Egipto;

cos nejiw ngo marangüw atnej apiüng tiül a poch tarangas naquiüjpüw; pares ngo nanguiay andeacüw.

<sup>10</sup> Nganüy aaga jayats poch sanarang naquiüjpüw nipilan israel wüx lamatüch aaga nüt aliüc miün, apmajlüy atcüy:

Sanüüch macül xepoch teomalüw nejiw, sanayac wüx omeajtsüw nejiw.

Quiaj xique sanajlüy Midiosüw nejiw, nejiw apmajlüyiw xenipilan.

<sup>11</sup> Nejinguind ngome apmetam maquiaach alinop;

ngo metam maquiaach micoj nej michiig nej mapiüng: “Netam mendüüb Teat Dios”, maw,

cos meáwan nipilan apmajawüw jane xic, masey namix masey natang.

<sup>12</sup> Sanajiürüw lasta masey ngo majneaj tarangüw; asoetiw nejiw lango leaam ximeaats wüx ali-nomb, aw Teat Dios.

<sup>13</sup> Wüx Teat Dios andeac wüx aaga jayats poch quiaj, quiaj ajüic aaga ombas majlüy lango metam. Pares leaw lango metam apmamong, apndrom.

## 9

*Niüng arangüch casa Teat Dios ningüy wüx iüt, at tiül cielo*

<sup>1</sup> Naleaing aaga ajlüyay poch tapiüng nguineay marangüch casa Teat Dios, at tandeac wüx nop nangaj iüm ningüy wüx iüt. <sup>2</sup> Cos aaga nine nangaj iüm taag quiaj, nasoic tabernáculo, tajiür ijquiw teomeaats. Aaga ombas teomeaats quiaj minüt nej Nangaj. Altiül noic nadam candiler, at nop mes alwüx pan leawa tajmel marangüch casa Teat Dios. <sup>3</sup> Aaga nine nangaj iüm quiaj ajiür cortin pinawan; necamb aaga cortin quiaj ajiür alinoic teomeaats; aag ayaj minüt nej Xeyay Nangaj. <sup>4</sup> Tiül aaga Xeyay Nangaj teomeaats quiaj, alquiaj noic artül narangüch oro ambeliw wüx pom. Aton tajlüy quiaj nop mbaw, ombas nej oro. Aaga mbaw quiaj minüt nej Mimbaw Jayats Poch, cos tiül aaga mbaw quiaj ajlüy nop nine xar palüy oro, iquial aaga atnej pan nenüt maná leaw tajmiüc imiün tiül cielo. Aton altiül a mbaw quiaj aaga nangoraad tsatsat, aag ayaj angot Aarón. Átan altiül ajcüwa piedra alwüx gajpowüw poch tarang Teat Dios. <sup>5</sup> Wüx opech aaga mbaw quiaj alem-bemoj ijpüw querubines, ajlüyiw atnej ángeles, cos aag ayaj ajüiquichaw Teat Dios ajlüy quiaj. Ajcüw

ayaj andeniw naag miolümbiw nejiw aaga mbaw quiaj. Aag ayaj nganüy lango matüch nasaj icon wüx palan.

<sup>6</sup> Wüx landoj lajlüy quiaj meáwan tiül aaga nangaj iüm quiaj, quiaj ajcüwa miteaats ajmeliw rawrráwan tiüt tiül aaga mbas teomeaats iüm taag marangüw minajiütüw nejiw marangüw casa Teat Dios. <sup>7</sup> Pero tiül aaga amb ijquiaw teomeaats iüm taag, néjan minatang miteaats alndom majmel nomb oleaj tiül nomb neat. Naleaing nej ngondom majmel sitiül ngo majoy miquiej nimal maripip quiaj, cos ombas netam mayac ichech nej, ndoj alndom mayac ichech nipilan majüiquich asoetiw masey ngo mayajcüw arangüw. <sup>8</sup> Wüx aag ayaj Dios Nangaj Espíritu üüch icoots majawaats nganaw lejquiam majmeleran tiül aaga Xeyay Nangaj tiül iüm taag, wúxan ajcüw miteaats arangüw minajiütüw nejiw tiül aaga ombas palaw teomeaats nangaj iüm quiaj. <sup>9</sup> Aaga nangaj iüm ningüy wüx iüt cam apiüng wüx nguineay ajlüy tiül cielo niüng ajlüy Teat Dios. Cos aaga leaw tearangüch tiül aaga nangaj iüm quiaj, wüx ayacüw nichech, ambiyaw nimal majüiquich asoetiw nejiw, aag ayaj ngondom müüch nejiw mayajcüw laáw asoetiw nejiw. <sup>10</sup> Cos aaga ajlüyay tarangüw quiaj wüx nüeteran, wüx nanganewaran, wüx cuajantanej najantsüch; ajcüw ayaj najneaj, ocueaj ombasaran. Cos meáwan aag ayaj tetam, tiün ndom wüx Teat Dios tüüch miün Teat Cristo, quiaj mbiüjlat aag ayaj, lango metam.

<sup>11</sup> Pero wüx Teat Cristo tamb marang minatang miteaats tiül cielo, nej tüüch icoots noic

tabernáculo leaw xeyay najneajay. Aag ayaj ngome arangüch naag owix nipilan, at ngome ocueaj iüt cam. <sup>12</sup> Cos wüx Teat Cristo tajmel quiaj tiül aaga Xeyay Nangaj tiül cielo niüng ajlüy Teat Dios, nej ngo majoy miquiej teants, tengwüy miquiej wacüx; nejay tamb mayac miquiej nej marang nichech. Atquiaj lamawün asoetiiüts nómban. <sup>13</sup> Cos nomb jane ngo marang leaw ajlüyay netam marang, netam majwich wüx ombasüw miquiej toro, tengwüy miquiej teants, tengwüy mingweat vaquilla; cos atquiaj alndom majlüyiw najneaj alinomb teombas Teat Dios. <sup>14</sup> Sitiül aaga leaw arangüw quiaj tüüch nejiw majlüyiw najneaj, ¡cuantemas nganüy miquiej Teat Cristo nómban apmüüch icoots majlüyiiüts najneaj! Cos Teat Cristo masey ngo majiür nisoet nicuajind, nejay teyacüy marang nichech müüch Teat Dios. Tarang aag ayaj cos Nangaj Espíritu ocueaj Teat Dios leaw almajlüy meáwan nüt tambeol nej. Nganüy lango metam marangaats aaga ajlüyay quiaj; alndom marangaats leaw Teat Dios andiüm cos nej almapac.

<sup>15</sup> Teat Cristo ajlüy wüx noic jayats poch. Nganüy meáwan nipilan leawa Teat Dios lamarriiüd apmüjndiw leawa nej lamapiüng apmüüch majiürüw meáwan nüt. Cos Teat Cristo tandeow mawün nej asoetiw, masey áag leawa tarangüw wüx aliün majlüyiw tiül aaga poch ombas majlüy. <sup>16</sup> Wüx ajlüy noic poch apiüng wüx nguineay apmbajcam cuajantanej leaw aneay aljane, quiaj ombas netam majaraw sitiül naleaing landeow leaw neyac aaga poch quiaj, <sup>17</sup> Cos aaga

poch quiaj ngo membeat sitiül nerang nej aliün mapac; nganüy sitiül landeow, quiaj nembeat. <sup>18</sup> Atquiaj sitiül ngo majlüy miquiej nop nimal marang nichech, aaga ombas poch ngo membeat aton. <sup>19</sup> Cos Moisés wüx landoj masaj nipilan meáwan poch leawa tüüch nej Teat Dios, quiaj tayar miquiej nine toro, at miquiej teants, mayac tiül yow; condom tayar nacants milan sap, at mipüüg xiül nasoic hisopo masoc tiül a quiej, cas tawiichwiich wüx nawiiig; at tawiichwiich wüx ombasüw meáwan nipilan. <sup>20</sup> Wüxan tengual marang aag ayaj Moisés tapiüng: “Aaga quiej cam üüch membeat aaga poch tayac Teat Dios, leaw netam merangan”, aw. <sup>21</sup> Ngome áagan ayaj, at aton tawiichwiich quiej wüx aaga nangaj iüm taag, y wüx meáwan cuajantanej leawa netam nejiw wüx arangüw casa Teat Dios. <sup>22</sup> Lami cuajantanej netam mawiichwiich wüx quiej para matajcüch majneaj atnej apiüng tiül aaga poch tüünd Moisés. Átan sitiül nimal ngo mambiyaran maw miquiej nej, nejinguind ngondom maw wüx asoet.

*Teat Cristo wüx tandeow tawün asoeteran nómban*

<sup>23</sup> Quiaj ajüic netam majwich quiej wüx cuajantanej najlüy tiül aaga nangaj iüm taag, para matajcüch majneaj atnej apiüng tiül aaga poch tayac Moisés; cos aag ayaj apiüng wüx leaw almajlüy tiül cielo. Nganüy aaga najlüy tiül cielo netam mayacüch noic nichech alwüx ajneaj, alwüx atam, ngome atnej najlüy ningüy wüx iüt. <sup>24</sup> Cos Teat Cristo ngo majmel tiül aaga Xeyay Nangaj omeaats iüm tiül nangaj iüm leaw almajlüy ningüy wüx

iüt; naleaing, tajmel tiül aaga Xeyay Nangaj leawa najlüy tiül cielo. Cos aaga nangaj iüm leawa najlüy ningüy wüx iüt, aag ayaj apiüng wüx nguineay ajlüy tiül cielo. Pares Teat Cristo tajmel quiaj tiül cielo niüng ajlüy Teat Dios matün ocueajiiüts. <sup>25</sup> Nej ngo metam meyacüy marang nichech neatneátan atnej arang minatang miteaats wüx ajmel tiül aaga Xeyay Nangaj majoy mamb miquiej nimal, ngome miquiej nej. <sup>26</sup> Cos sitiül Teat Cristo netam mayac nichech mangüy asoetiiüts neatneátan atnej tetam marangüw minatang miteaats, quiaj apmetam mandeow neatneátan aton, nde wüx tajlüy aaga iüt cam. Nganüy nde wüx tapeay ningüy wüx iüt cam, quiaj nomb teyacüy mandeow mawün asoeteran. <sup>27</sup> Meáwan nipilan nomb netam mandeow, condom Teat Dios apmajaw wüx asoetiw nejiw. <sup>28</sup> Atquiaj Teat Cristo aton teyacüy nomb mandeow mawün asoet xeyay nipilan. Nganüy wüx aliüc amb ijmbüw langome apmawün asoet nipilan; nej aliüc mawün wüx nipilan leaw teamacül nej.

## 10

<sup>1</sup> Aaga poch tüünd Moisés ajüiquich wüx leawa najneajay apmajlüy alinoic nüt, ngo mapiüng ranüy nguineay apmajlüy. Pares wüx aaga poch tüünd Moisés, nejinguind ngondom majwan asoet nej nómban masey mayac nichech, cos neatneátan netam mayacüch nichech. <sup>2</sup> Sitiül aljane mayac ichech nej maw asoet nej nómban, quiaj ngome apmayaag ajjür nisoet. Nganüy cos asoet nej ngondom maw nómban, pares ngondom macueat



mayac nichech. <sup>3</sup> Pero aaga nichech ajmel neat-neátan quiaj, alndom müüch leaam omeajtsüw wüx asoetiw nejiw, áagan alndom marang. <sup>4</sup> Cos miquiej toro, tengwüy miquiej teants niqimás ngondom mawün asoeteran nómban.

<sup>5</sup> Por aag ayaj wüx tapeay Teat Cristo ningüy wüx iüt, nej tasaj Teat Dios, tapiüng:  
Ngo mendiüm majmel wüx artül nimal nambiy-eran, tengwüy cuajantanej nichech,  
cos ique teaach xic najlüy nipilan para ndom nandeow narang nichech.

<sup>6</sup> Ngo mind mejaw aaga nichech wüx nimal mandaab wüx artül;  
at ngo mind mejaw cuajantanej nichech leaw nayacüch maw nisoet.

<sup>7</sup> Quiaj tapiüngas: “Jogüy xic Teat, lasapeay ningüy narang leawa ique indiüm,  
atnej larangüch tiül nawiig niüng apiüng wüx xique”, aw.

<sup>8</sup> Wüx aaga landoj mapiüng quiaj, ajawaats Teat Cristo tasaj Teat Dios: “Ique ngo mendiüm, ngome tajnej mejaw majmel wüx artül nimal nambiy-eran marang nichech. At ngome tendiüm mejaw cuajantanej nichech leaw andaab wüx artül; at ngome tendiüm mejaw cuajantanej alinoic nichech ocueaj nisoet”, aw. Atquiaj tapiüng Teat Dios, masey meáwan nipilan tayacüw ichechiw nejiw atnej apiüng tiül aaga poch tüünd Moisés.

<sup>9</sup> Condom Teat Cristo tapiüng alinomb: “Jogüy xic Teat, lasapeay ningüy narang leaw ique indiüm”, aw. Aag ayaj ajüic Teat Dios lamawün ajcüwa nichech leaw Moisés tayac, condom nejay Teat Cristo teyacüy marang nichech wüx tandeow.

<sup>10</sup> Teat Cristo tarang leaw apiüng Teat Dios, pares nganüy laáw asoetiiüts nómban, cos nej tandeow marang nichech nómban mangüy asoetiiüts.

<sup>11</sup> Naleaing ajcüwa miteaats tiül nipilan israel arangüw minajiütüw nejiw rawrráwan, mbójan ayacüw nichech; pero aag ayaj ngondom mawün nisoet nómban. <sup>12</sup> Nganüy Teat Cristo áagan nomb teyacüy mandeow marang nichech mawün asoet nipilan. Condom quiaj tamb andüy tiül cielo chetem amb wüx miác Teat Dios. <sup>13</sup> Teamacül wüx Teat Dios apmayac tiüt teoleaj nej meáwan leaw ngo mandiümüw nej. <sup>14</sup> Cos Teat Cristo áagan nomb teyacüy mandeow marang nichech. Naleaing nej nómban tawün nisoet ocueaj meáwan nipilan leawa larriüjtüch majlüyiw najneaj, nangaj. <sup>15</sup> At aaga Nangaj Espíritu ocueaj Teat Dios aton ajüiquich aag ayaj naleaing wüx tapiüng:

<sup>16</sup> Aag agüy jayats poch sanarang naquüjpw wüx aaga nüt aliüc miün, atcüy apmajlüy:  
Sanüüch macül xepoch tiül omalüw, at wüx omeajtsüw nejiw.

Sanüjchiw majawüw nguineay sandiüm marangüw, aw.

<sup>17</sup> Aton apiüng:

Niquimás ngome apleaam ximeaats wüx asoetiw nejiw, leaw ngo majneaj arangüw.

<sup>18</sup> Pues wüx laáw asoeteran, quiaj lango metam majmel nichech alinomb maw nisoet.

### *Netam mayambaats Teat Dios*

<sup>19</sup> Pares xecojow xechijquiaw, ngo metam mimbolaats cos alndom majmeliüts tiül aaga Xeyay Nangaj niüng ajlüy Teat Dios, cos Teat Cristo

tandeow, taw miquiej nej mangüy asoetiüts. <sup>20</sup> Nej tarang aaga jayats tiiüd leaw among necamb aaga cortin wüx teyacüy nejáyan quiaj mandeow mangüy asoetiüts. Cos nej tarang atquiaj, nganüy alndom mapacaats meáwan nüt. <sup>21</sup> Nganüy ajiüraats Teat Cristo, nej minatang miteaats ocueaj meáwan minipilan Teat Dios. <sup>22</sup> Pares alndom matüchiiüts Teat Dios con omeajtsaats cos ajawaats leawa teamandüjpiiüts. At ajawaats miquiej Teat Cristo lamawün asoetiüts; quiaj ngo mayajcaats ajiüraats nisoet, cos aag ayaj atnej Teat Dios taxejmbeach icoots naag nerexix yow. <sup>23</sup> Nganüy netam tanaámb macüliiüts aaga xeyay najnej leaw apmüjndiiüts alinoic nüt; ngondom machiweaats omeajtsaats, cos Teat Dios apmüüch icoots leawa lamapiüng apmüüch, nej ngo mawaiich. <sup>24</sup> Pares netam mayambaats nguineay alndom mejiürayoots lasta nop alinop, nguineay alndom membeolayoots marangaats más najnej. <sup>25</sup> Tanaámb netam canchiümoots nóiquian mequiaachayoots wüx Mipoch Teat Dios; ngondom mecueatayoots matnej arangüw altiül. Tanaámb netam membeolayoots, pero nganüy más netam cos ajawaats laliüc matüch aaga nüt wüx aliüc Teat Cristo.

<sup>26</sup> Nganüy sitiül aljane alwüx omeaats mandiüm marang ngo majnej, masey nej lamajaw naleaing leaw apiüng tiül Mipoch Teat Dios, quiaj lango majlüy nicuajind nichech para ndom mawün asoet nej. <sup>27</sup> Xeyay apmbayamoj majawüw aaga xeyay ngo majnej leaw apmajlüy alinoic nüt wüx Teat Dios apmajaw wüx asoeteran, ndoj apmandrooch ombas tiül biümb meáwan leaw ngo mayar nej

andeac. <sup>28</sup> Cos nomb sitiül aljane ngo marang atnej apiüng tiül aaga poch tüünd Moisés, at sitiül ajlüy ijpüw arojpüw monjaw leaw arang, aaga nipilan quiaj netam mandeow, niqimás ngon-dom maw wüx. <sup>29</sup> ;Sitiül aag ayaj tetam mandeow, cuantemas ngo majneaj apmajlüy wüx aljane leaw apiüng ngo metam nej Micual Teat Dios; at leaw tayac atnej ngo membeat miquiej nej; at leaw ngo marang casa Nangaj Espíritu ocueaj Teat Dios, aaga nembeol icoots! Pues miquiej Teat Cristo awün asoet meáwan nipilan leaw ayariw aaga jayats poch leaw üüch nejiw marangüw najneaj. <sup>30</sup> Cos ajawaats Teat Dios tapiüng: “Xique sanapalüch ombas mangüyw leawa tarangüw”, aw. Alinoic tapiüng: “Teat Naxey apmajaw wüx asoetiw minipilan nej”, aw. <sup>31</sup> ;Xeyay xeyay ngo majneaj apmamongoch nop nerang ngo majneaj wüx apmajmiüc teowix Teat Dios almapac!

<sup>32</sup> Pero ich leaam imeajtsan wüx teyariün aaga poch ocueaj Teat Cristo, quiaj temongochiün xeyay ngo majneaj. Masey tajcüy majaw icon nipilan, naleaing icona teiücan wüx. <sup>33</sup> Naleaing nguiaj titsojow icon, tandeacüw ngo majneaj wüx imbasan niüng ajlüy nipilan. Nguiaj tequiüjpan tiül ajcüw leawa tamongochiw ngo majneaj. <sup>34</sup> Tejiüran lasta leawa tajmeliw tiül manchiüc. At wüx tajnot icueajiün leaw ijiüran ngo mamix imeajtsan, cos tejawan apmeajndiün tiül cielo leaw alwüx ajneaj, leaw nejingund ngondom manood, cos aag ayaj apmejiüran meáwan nüt. <sup>35</sup> Nde paxiüm icueajiün; ich leaam imeajtsan aaga najneajay leaw apmeajndiün tiül

cielo. <sup>36</sup> Pares icona netam meiündan wüx leaw apmemongochiün wüx irangan leaw andiüm Teat Dios; quiaj apmeajndiün leaw lamapiüng Teat Dios apmüüch. <sup>37</sup> Tiül Mipoch Teat Dios apiüng: Najénan aliüc leawa lamapiüng aliüc, ngome apmequiy.

<sup>38</sup> Nganüy leaw lamayar sandeac, tanaámb netam mandüüb xic meáwan nüt. Pero sitiül aljane achiw omeaats, ngo mandüüb xic, aag ayaj ngo mapac ximeaats najaw, aw.

<sup>39</sup> Pero icootsa ngo majlüyiiüts matnej ajcüw lapaxiow ocueajiw, lamacueatiw nómban, ndoj apndrom ombasüw tiül aaga xeyay ngo majneaj. Naleaing ajlüyiiüts tiül ajcüw leaw tanaámb teamayariw Mipoch Teat Dios, ndoj laawüw wüx, lango mambüw tiül aaga xeyay ngo majneaj.

## 11

### *Ajawaats naleaing leawa teamandüjpiiüts*

<sup>1</sup> Wüx lamayariiüts andeac Teat Dios, quiaj ajawaats apmajiüraats leawa teamacüliiüts, masey nganaw maxomaats majawaats aag ayaj. <sup>2</sup> At wüx nipilan nde tanomb tayariw andeac Teat Dios, quiaj Teat Dios najneaj majaw nejw.

<sup>3</sup> Nganüy cos lamayariiüts andeac Teat Dios, quiaj ajawaats nej tarang iüt, tarang nüt, tarang caaw, tarang ocas; cos wüx nej tandeac quiaj tajlüy meáwan leaw almajlüy. Pares meáwan leaw axomaats majawaats nganüy, aag ayaj Teat Dios tarang naag leawa ngomeaag ajaraw.

<sup>4</sup> Abel tayar andeac Teat Dios, tayac noic nichech leawa Teat Dios tandiüm, ngo matnej

leawa tayac micoj nej Caín; aag ayaj Teat Dios ngo mandüüm. Quiaj Teat Dios tajüiquich najneaj arang Abel wüx tayar ichech nej. Nganüy masey nej landeow, tanaámb anderac wüx nguineay nej tayar andeac Teat Dios.

<sup>5</sup> At Enoc, cos tayar andeac Teat Dios, aleáingan tamb andüy tiül cielo, ngo mandeow. Masey nipilan tamb mayambüw nej, ngo maxomüw, cos Teat Dios lamaquiiüb nej mamb andüy tiül cielo. Wüx nganaw maquiüraab andüy tiül cielo, tajüic nej naleaing tarang palan leawa andiüm Teat Dios. <sup>6</sup> Nejingund ngondom marang palan leaw andiüm Teat Dios sitiül ngo mayar andeac nej. Cos leawa nendiüm matüch niüng ajlüy Teat Dios, netam mayaag tiül omeaats, majaw Teat Dios almajlüy. Jangantanej leaw apmayamb nej, Teat Dios apmüüch majaw jane nej.

<sup>7</sup> Aaga Noé nde tanomb tayar andeac Teat Dios, tarang nop nadam müx mawün nejiw wüx, ngo mandeowüw tiül yow mintaj nej, at meáwan micual nej. Atquiaj tarang cos Teat Dios ombas lamasaj nej apmajlüy leaw nganaw majaraw. Quiaj Noé tayar andeac Teat Dios, tarang atnej lamasoic. Wüx nej tarang aag ayaj, quiaj tajüiquich meáwan aldemas nipilan wüx iüt ngo mayariw andeac Teat Dios. Noé tayar andeac Teat Dios, quiaj taw wüx cos Teat Dios tajaw najneaj arang.

<sup>8</sup> Teat Abraham aton, wüx tapaj nej Teat Dios, tayar leawa tasoic; taw tiül miüt nej, tamb andüy tiül alinoic iüt niüng lamapiüng Teat Dios apmüüch nej. Tamb andüy alinoic iüt masey ngo majaw nguiane andüy apmamb. <sup>9</sup> Tayar andeac Teat Dios, pares tacül tiül aaga iüt niüng Teat Dios

lamapiüŋ apmüüch. Tacül quiaj atnej napeay miün nipilan tíulan iüm taag maquiiüb micual nej Isaac y Jacob. Atquiaj tarangüw cos Teat Dios lamapiüŋ nejiw apmüjndiw aaga iüt quiaj. <sup>10</sup> Atquiaj tarang Abraham cos teamandiüm macül tiül aaga najneajay cambaj leaw ngo ndrom ombas cos witiüt wüx leawa nandand. Aaga cambaj quiaj Teat Dios tapiüŋ nguineay apmajlüy, ndoj tarang.

<sup>11</sup> At nejay müm Sara mintaj Abraham, tayar andeac Teat Dios; pares Teat Dios tüüch nej majiür teomeaats nej micual nej, masey lamong nüt alndom majiür micual nej. Atquiaj tajlüy, cos tayar andeac Teat Dios wüx tasaj nej apmüüch nej micual nej. <sup>12</sup> Ajan wüx nop naxey tajlüy xeyay nacualaran, masey nej xeyay latang. Ajan wüx micual nej quiaj, tajlüyiw xeyay nipilan atnej ajlüyiw ocas, aton atnej miwiiüd nadam ndec, nejingiind ngondom mateow.

<sup>13</sup> Meáwan nejiw tandeowüw wüx nganaw müjndiw leaw Teat Dios lamapiüŋ apmüüch. Pero nejiw cos lamayariw andeac Teat Dios, áag tapiüŋgüw naleaing alinoic nüt apmüjndiw aag ayaj. Nejiw apiüŋgüw ajawüw ajlüyiw ningüy wüx iüt at nejiw napeay miün nipilan. <sup>14</sup> Cos leaw nepiüŋ atquiaj ajüic tealeámban mayambüw noic iüt niüŋ apmacüliw. <sup>15</sup> Sitiül ndot leam omeajtsüw miütüw nejiw niüŋ tawüw, quiaj ngo maél mandilileaw alinomb. <sup>16</sup> Pero nejiw tayacüw omeajtsüw wüx noic cambaj más najneaj, aag ayaj tiül cielo. Pares Teat Dios apac omeaats masoic nej Midiosüw ajcüwa nipilan quiaj; nej lamarang noic cambaj niüŋ apmacüliw.

<sup>17</sup> Teat Abraham cos tayar andeac Teat Dios, quiaj tayac Isaac micual nej marang ichech nej, cos Teat Dios tandiüm majaw sitiül naleaing ap-marang atnej lamasaj. Quiaj Abraham tamb maquiüb aag anopüyan micual nej marang ichech nej, masey tilüy quiaj Teat Dios tasaj nej: <sup>18</sup> “Ajan wüx Isaac apmajlüy xeyay micual”, aj. <sup>19</sup> Cos Abraham tapiüng tiül omeaats, tajaw Teat Dios alndom mapacüüch micual nej alinomb. Pero masey Teat Dios ngo müüch Abraham mambiy micual nej, naleaing Abraham tayaag atnej landeow micual nej, ndoj tayaag atnej Teat Dios lamapacüüch nej alinomb.

<sup>20</sup> Teat Isaac cos tajaw nguineay apmajlüy alinoic nüt, quiaj tayar andeac Teat Dios, tatün ocueaj Teat Dios mambeol micual nej Jacob at a Esaú. <sup>21</sup> Aton teat Jacob cos tayar andeac Teat Dios, pares wüx laliüc mandeow, quiaj tayar mapeaand tiüt angot nej, ndoj tanguer omal tiüt, tatün ocueaj Teat Dios mambeol nopnop micual José. <sup>22</sup> Teat José aton cos tayar andeac Teat Dios, pares wüx laliüc mandeow tapiüng micual Israel apmawüw tiül Egipto alinoic nüt. Aton tasaj nejiw netam macajüw tiüt miolaats nej majoyiw mamb mamiütüw niüng andüyiw quiaj.

<sup>23</sup> Aton miteat Moisés y mimüm nej, cos tayariw andeac Teat Dios, pares wüx wijquiat Moisés taxotüw arej caaw; cos tajawüw nej nop nine naneaj natsüjyay ombas. Ngo mimboloj masey minatang nenajiüt lamapiüng netam mandeow meáwan namix nine monench tiül nipilan israel. <sup>24</sup> At teat Moisés aton tayar andeac Teat Dios, pares wüx latang ngo mandiüm masoic micual nej



aaga nüx micual Faraón. <sup>25</sup> Pero teat Moisés tariiüd mamongoch ngo majneaj nóiquian maquiiüb minipilan Teat Dios ingow mapac omeaats acásan nüt marang leaw ngo majneaj. <sup>26</sup> Atquiaj tarang cos ajaw más najneaj mamongoch naél wüx aaga Cristo leaw aliüc miün alinoic nüt, ingow ajiür cuajantanej tiül Egipto. Cos nej tajaw Teat Dios apmüüch nej leaw xeyay nembeat alinoic nüt. <sup>27</sup> Teat Moisés tayar andeac Teat Dios, pares taw tiül Egipto; ngo mimbol masey xeyay apmajcüy natang nenajiüt. Moisés taíüc wüx meáwan cos atnej taxom majaw Teat Dios masey ngondom maxoram majaraw.

<sup>28</sup> At cos teat Moisés tayar andeac Teat Dios, pares tapiüng marangüw aaga pascua atnej lamasaj nej Teat Dios. Aton tasaj minipilan nej mawichwich miquiej sap mbeaymbeay ombiümüw nejiw, cos atquiaj aaga ángel apmamóngan wüx, ngome apmambiy aaga ombas wijquiam nacualaran tiül israel. <sup>29</sup> Ajcüwa nipilan israel cos ayariw andeac Teat Dios, pares tamongoj tiül aaga Nacants Ndec. Tamongoj cos Teat Dios tambaag a ndec, tüüch nómban mawaag, íütan tiüt. Nganüy wüx monaw Egipto tandiümüw mamongoj aton, quiaj tapal nejiw tiüt tiül ndec, meáwan nejiw tandeowüw.

<sup>30</sup> At aton cos nipilan israel tayariw andeac Teat Dios, pares wüx landoj mayeyiw tiüt a cambaj Jericó ayaíw nüt, quiaj Teat Dios tüüch majmiüc meáwan aaga piedra leaw arangüch otüeng coet neyey tiüt aaga cambaj quiaj. <sup>31</sup> At aaga Rahab, nop nelomblombüy najtaj leawa ndoj tayar an-

deac Teat Dios, tambeol ajcüwa monxey monaw Israël, ajcüw leaw tambüw mandacüwiw a iüt. Aaga Rahab ndoj taw wüx, ngo mandeow maquiiüb nipilan tiül Jericó leaw ngo mayariw andeac Teat Dios.

<sup>32</sup> ¿Cuane alinoic sanasaj icon wüx aag ayaja? Naleaing lango matüch nasaj icon wüx Gedeón, wüx Barac, wüx Sansón, wüx Jefté, wüx David, wüx Samuel, at wüx meáwan mondeac andeac Teat Dios. <sup>33</sup> Pues nejiw tayariw andeac Teat Dios, áag wüx tambüw tiül montsoj tajntsopiw wüx meáwan leaw tajcüy majawüw nejiw tiül palpálwüx iüt. Ndoj tarangüw najneaj wüx a nipilan quiaj. Teat Dios tüüch nejiw leawa lamapiüng apmüüch, at tapal ombeay león, ngo matsamb nejiw. <sup>34</sup> Aton leaw tayacaranüw tiül biümb, ngo mandajpüw. At wüx aljane andiüm mambiy nejiw naag espada, nejiw tawüw wüx. Altiül tambeol nejiw Teat Dios tiül montsoj wüx ngondom ombasüw. Aton altiül ndoj ombasüw majntsopiw wüx leaw ajcüy majaw nejiw tiül montsoj, tüüch mecuiürrüw montsoj monaw palpálwüx iüt. <sup>35</sup> Alacas montaj, cos tayariw andeac Teat Dios, pares Teat Dios tapacüüch alinomb acualajtsüw nejiw leawa landeowüw.

Altiül monyar andeac Teat Dios tamongochiw xeyay ngo majneaj; tambiyaranüw cos ngo mandiümüw macueatiw andüjpiw Teat Dios. Nejiw tajawüw apmajlüyiw más najneaj wüx apmapacüw alinomb. <sup>36</sup> Alacas cos ayariw andeac Teat Dios, pares titsojaranüw. Altiül tajwüchiw, altiül taoeleranüw naag galen, altiül tajmeliw tiül manchiüc. <sup>37</sup> Alacas cos tayariw

andeac Teat Dios tandeowüw najlosüw; alacas tandoogaranüw naag sier; alacas tambiyaranüw naag espada. Alacas tajüyjüwiw acüliw ninguiün ninguiün, tasoijquiw apixaw nejiw miotaag sap miotaag teants, ngo majiürüw nicuajind; tajcüyaran majarawüw, tamongochiw xeyay cuajantanej ngo majneaj. <sup>38</sup> Alacas cos tayariw andeac Teat Dios netam majüyjüwiwan. Altiül tacüliw tiül wajchiüc, altiül tacüliw wüx tiüc, at tiül warraj tiüc, tengwüy tiül nadam warraj iüt. Masey tamongochiw meáwan aaga ngo majneaj quiaj, nejiw xeyay nembeatiw majaw nejiw Teat Dios. <sup>39</sup> Naleaing tajüiquichaw ayariw andeac Teat Dios cos tajüic nguineay tamongochiw aag ayaj. Nganüy Teat Dios tiül aaga nüt quiaj ngo müüch nejiw leaw lamapiüng apmüüch. <sup>40</sup> Cos Teat Dios tajaw alinoic nüt apmüüch icoots leawa más najneaj, áag ngo müüch nejiw ombas leaw lamapiüng apmüüch icoots.

## 12

### *Netam mayacaats omeajtsaats wüx Teat Jesús*

<sup>1</sup> Ajawaats tajlüyiw xeyay nipilan leaw taiündüw wüx cuajantanej cos tayariw andeac Teat Dios; ajcüw ayaj atnej oic ayeyiw icoots tiüt nganüy. Sitiül ajlüy cuajantanej leaw alndom mapal icoots ngo marangaats najneaj, tengwüy sitiül nisoet itsoj omalaats, meáwan aag ayaj netam macueatiiüts. Netam mandüjpiiüts leaw Teat Dios lamayac icoots wüx. <sup>2</sup> Netam mayacaats omeajtsaats wüx Teat Jesús, cos nej tayac icoots wüx leaw teamandüjpiiüts, at teamambeol icoots

marangaats palan leaw andiüm Teat Dios. Nej tajaw alinoic nüt xeyay apmapac omeaats, pares taiüc wüx mamongoch xeyay necoy wüx tandeow wüx cruz, ngo mapiüng wüx masey xeyay monxing. Wüx ndoj aag ayaj, nej tamb chetem amb wüx miác Teat Dios wüx aaga najneaj chetejeran wüx tiül cielo.

<sup>3</sup> Ich leaam imeajtsan wüx nguineay tamongoch Teat Jesús; cos xeyay tajcüyw majawüw nej nipilan monrang ngo majneaj. Pares tanaámb indüjpiün, nde paxiüm icueajiün, nde mamix imeajtsan. <sup>4</sup> Masey itsojon mequiüjpan nisoet, pero nganaw maw miquiejiün mendeowan cos iyariün andeac Teat Jesús. <sup>5</sup> ¡Neol landroj imeajtsan wüx aaga poch tüüch icon Teat Dios atnej asoic wüx nop nacualaran! Cos tiül Mipoch Teat Dios atcüy apiüng:

Xecual, nde mepiüng ngo mind menguiay wüx apmapaj icueaj Teat Dios.

Nde paxiüm icueajiün wüx nej apmayac ic wüx naél.

<sup>6</sup> Cos meáwan nipilan leawa Teat Dios andiüm, nej apmapaj ocueaj.

Aton nej alic meáwan leawa lajlüyw micual nej.

<sup>7</sup> Netam meiücan wüx aaga apaj icueajiün quiaj; cos quiaj ajüic Teat Dios apaj icueajiün atnej nop nateateran apaj ocueaj micual nej. ¿Mbich ajlüy nop nacualaran ngo mapaj nej ocueaj miteat neje? <sup>8</sup> Pero sitiül Teat Dios ngo mapaj icueajiün atnej ajpaj ocueaj nacualaran, quiaj ajüic icona ngome naleaing necualaranan, ijlüyiün atanej necualaranan wüx lada. <sup>9</sup> Cos ajiüraats miteatiiüts ningüy wüx iüt leaw tapajüw ocueajiiüts, ndoj

tayariiüts ocueajiw. ¡Cuantemas Miteatiiüts Dios tiül cielo netam mayariiüts ocueaj wüx apaj ocueajiiüts, ndoj apmapacaats meáwan nüt!  
<sup>10</sup> Naleaing miteatiiüts ningüy wüx iüt tapajüw ocueajiiüts acas neat cos nejiw apiüngüw netam; pero Teat Dios meáwan nüt apaj ocueajiiüts cos nej ajaw aag ayaj apmambeol icoots marangaats najneaj, majlüyiiüts najneaj atnej ajlüy nej.  
<sup>11</sup> Cos wüx ajpaj ocueajiiüts, aag ayaj ngo müüch icoots mapac omeajtsaats; üüch icoots mamix omeajtsaats. Pero wüx landoj mamongochiiüts aaga apajaran ocueajiiüts quiaj, lamajawaats nguineay netam marangaats. Condom quiaj apmajiüraats más najneaj omeajtsaats, at apmarangaats más najneaj.

*Xeyay ngo majneaj apmajlüy jane ngo mind manguiay andeac Teat Dios*

<sup>12</sup> Pares ijchan mapac iwixan ileajiün leaw ngo majiür apac, para alndom meiücan wüx leawa tememongochiün. <sup>13</sup> Netam meyacan ileajiün wüx mejüyiün tiül aaga naleaing tiiüd para ndom merangan leaw andiüm Teat Dios, cos atquiaj apmembeolan leaw atnej necoex ngana majmiüc tiül tiiüd, ngo mapac wüx mandüüb Teat Cristo.

<sup>14</sup> Átan ipacan wüx mejlüyiün najneájan mequiüjpan meáwan nipilan, tanaámb netam merangan leaw andiüm Teat Dios. Cos sitiül ngo merangan atquiaj niquimas ngondom mejawan Teat Dios. <sup>15</sup> Aton ipacan wüx, ngana aljane ngo mayar mimonajneaj Teat Dios. Cos sitiül moncüy majntsop tiül icona, aag ayaj atnej mioxiich nangaag soex leaw apmayac ngo majneaj tiül

icona. Cos atquiaj alndom majjü aaga nangaag tiül icona mayac icon wüx majlÿ ngo majneaj.

<sup>16</sup> Nde mejiüran minajtajan, minaxeyiün; nde mepiüangan ngo membeat leawa Teat Dios ajaw nembeat, cos atquiaj tarang Esaú. Nej tanüüb leaw apmajcueat müünd natang nacualaran. Tanüüb aag ayaj cos tandiüm noic nüeteran.

<sup>17</sup> Icona lamejawan alinoic nüt wüx Esaú tandiüm mayar leaw apmajcueat müünd, naleaing ngondom müünd, at ngo maxom nguineay alndom mayar, masey tajiünts xeyay cos andiüm mayar.

<sup>18</sup> Aaga leawa lamayariiüts ocueaj Teat Dios nganÿ, aag ayaj ngome atnej cuajantanej alndom majaraw masaramb. Ngo matnej wüx nüt mix-ejchiiüts tajawüw aaga tiüc teandaab, ancatitit, at anpojniün wüx, aton ancatearriür wüx atnej napaç iünd.

<sup>19</sup> Icona ngo menguiayiün ajiünts trompet, taton ngo menguiayiün andeac Teat Dios. Nganÿ leaw tanguiayiw aaga andeac Teat Dios quiaj, xeyay tatüniw nde mandeac alinoic poch.

<sup>20</sup> Cos ngo mind manguiayiw aaga xeyay naél poch quiaj leaw tapiüng: “Sitiül ndot nop nimal mamong wüx aaga tiüc quiaj, netam majlos tengwüy majengueran”, aw. <sup>21</sup> Xeyay tambolooch nejiw aaga tajawüw quiaj wüx mitiüc Sinaí. Quiaj Moisés tapiüng: “Xeyay ximbol, ambeapmbeap xic”, aw.

<sup>22</sup> Nganÿ icona atnej lametüchiün aaga tiüc nenüt Sión, tiül micambaj Teat Dios almapac, aaga Jerusalén tiül cielo niüng ajlÿy xeyay ángeles ngo matüch mateoraw; teamarangüw casa Teat Dios.

<sup>23</sup> At aton atnej lerpeayiün tiül niüng canchiüjow nacualaranüw ombas, larangüch minütiw nejiw

tiül cielo. At atnej lerpeayiün niüng ajlüy Teat Dios, áag apmejaw wüx ombas meáwan nipilan. At atnej lerpeayiün nóiquian mequiüjpan ajcüw espíritus ocueaj monyar andeac Teat Dios leaw tajlüyiw nomb. Nganüy Teat Dios lamüüch nejiw majlüyiw palanüy najneajay tiül cielo. <sup>24</sup> At atnej lerpeayiün niüng ajlüy Teat Jesús, aaga najlüy wüx jayats poch. At niüng ajlüy miquiej nej leaw xeyay nembeat, ngome atnej miquiej Abel.

<sup>25</sup> Ijawan wüx, nde mepalan ilajcan, netam menguiayiün leaw asaj icon Teat Dios. Cos sitiül ajcüwa nipilan tajlüyiw tanomb tamongochiw ngo majneaj, cos ngo mayariw leaw tasaj nejiw Moisés ningüy wüx iüt; ¡cuantemas icootsa ngo mawaats wüx asoetiiüts sitiül ngo mayariiüts leaw lamasaj icoots Teat Dios najlüy tiül cielo! <sup>26</sup> Wüx Teat Dios tendeac wüx aaga tüc nenüt Sinaí müüch manguiayiw nipilan israel, áag andeac nej nómban alanglang a iüt. Pero nganüy Teat Dios asaj icoots tiül Mipoch nej, apiüng: “Alinomb sanüüch melanglangüy ngome áagan a iüt; apmelanglangüy a nüt, caaw, ocas aton”, aw. <sup>27</sup> Aaga poch leaw tapiüng quiaj: “Alinomb sanüüch melanglangüy” maw, aag ayaj apiüng wüx leaw apmelanglangüy ngome apmacül meáwan nüt. Nganüy aaga leaw ngondom melanglangüy, aaga cielo niüng acül Teat Dios, aag ayaj apmacül meáwan nüt. <sup>28</sup> Pares nganüy mäjchiiüts gracias Teat Dios, cos lamüüch icoots mayariiüts aaga najneajay cambaj tiül cielo leaw ngondom melanglangüy. Netam marangaats casa Teat Dios con omeajtsaats atnej andiüm nej. <sup>29</sup> Pues Midiosaats ajlüy atnej noic biümb leaw

alndom mambel cuajantanej.

## 13

### *Netam marangaats leaw andiüm Teat Dios*

<sup>1</sup> Tanaám b ijiürayon lasta, netam mejlüyiün atnej nop necual icon. <sup>2</sup> Aton nde ndrom imeajtsan, netam mapac imeajtsan mejawan napeay miün nip- ilan, meajchiün leaw netam. Cos atquiaj tarangüw acas monxey tanomb, tüjchiw maxood aniüngüw nejiw ángeles, ngo mateotsüw wüx jane nejiw.

<sup>3</sup> Aton netam leaam imeajtsan wüx leaw altiül manchiüc, meyajcan atnej ilean tiül manchiüc mequiüjpan. Átan leaw teamamongochiw ngo majneaj, netam meyajcan atnej teamemongochiün ngo majneaj nóiquian mequiüjpan.

<sup>4</sup> Leaw langoch owixaw mequiübajey najneaj arangüw, wüx ameayiw nóiquian ngo majiür nicuajind. Pero naleaing naxey ngondom majiür pálwüx najtaj, at najtaj ngondom majiür pálwüx naxey. Meáwan monxey monjiür pálwüx najtaj tengwüy nüx, aton meáwan montaj monjiür pálwüx naxey tengwüy nench, pues Teat Dios apmajaw wüx asoetiw nejiw.

<sup>5</sup> At aton nde meyacan imeajtsan wüx mendiümdiüman tomiün. Ich mapac imeajtsan wüx leaw almejiüran nganüy, cos Teat Dios apiüng: “Ngo nacueat nambeol icon”, aw. <sup>6</sup> Pares ngo machiweaats omeajtsaats, alndom mapiüngaats atnej tanderac nomb: Teat Dios nembeol xic, ngo nimbol nicuajind leaw alndom marang wüx ximbas aljane.



<sup>7</sup> Ich leaam imeajtsan wüx ajcüw leaw tarangüw natang tiül icona, leaw taquiajchiw icon wüx Mipoch Teat Dios. Iyamban imeajtsan mejawan guineay tarangüw najneaj wüx almequiüjpan; irangan atnej tarangüw wüx tayariw andeac Teat Cristo.

<sup>8</sup> Teat Jesucristo, áag tambeol nejiw tim quiaj, atanej teamambeol icoots nganüy, aton atanej apmambeol icoots oxep nawiür, ngo majiür ümb. <sup>9</sup> Nde mendüjpiün wüx sitiül aljane apmaquiaach icon wüx cuajantanej pálwüx, ngo matnej lamayariiüts. Áagan Teat Dios alndom müüch icoots mimonajneaj nej cos ajiür icoots lasta. Sitiül mandüjpiiüts aaga poch leaw andeac wüx guineay alndom meteran, aag ayaj ngo mambeol icoots nicuajind.

<sup>10</sup> Nganüy ajiüraats noic nichech más xeyay nem-beat, ngo matnej tajlüy nomb. Tanomb miteaats tayacüw nimal wüx artül marang nichech tiül nangaj iüm taag, ngondom müetiw. <sup>11</sup> Cos nomb minatang miteaats ajmel tiül aaga Xeyay Nangaj tiül nangaj iüm ajoyiw miquiej nimal maripip quiaj mangüy asoeteran. Ndoj taquiüjpüw aaga nandeow nimal mambeliw mbeay cambaj. <sup>12</sup> Pares Teat Jesús aton tandeow mbeay cambaj mangüy asoet meáwan nipilan naag miquiej nej. <sup>13</sup> Nganüy netam mambaats mbeay cambaj niüng Teat Jesús tandeow, masey mamongochiiüts monxing atnej nej tamongoch. <sup>14</sup> Pues ningüy wüx iüt cam ngo majiüraats micambajaats leaw apmajlüy meáwan nüt. Nganüy teamayambaats aaga cambaj leawa aliüc miün niüng apmacüliüts alinoic nüt. <sup>15</sup> Cos

Teat Jesucristo tandeow, pares netam marangaats casa Teat Dios meáwan nüt, cos aag ayaj atnej мүjchiiüts ichechiiüts nganüy, y мүjchiiüts gracias Teat Dios. <sup>16</sup> Aton tanaámb netam membeolayoots, mejiürayoots lasta, cos aag ayaj atnej nichech leaw Teat Dios najnej majaw.

<sup>17</sup> Netam merangan leaw apiüngüw monajiüt tiül minipilan Teat Dios; netam meyajcan chingüy icona, nganüy nejiw natangüw. Cos aag ayaj minajiütüw nejiw, netam mambeolüw icon wüx minajiüt Teat Dios. Alinoic nüt Teat Dios apmajaw wüx nguineay tarangüw. Pares imbeolüw marangüw najnej, cos atquiaj apmapac omeajtsüw wüx minajiütüw nejiw, ngome apmamix omeajtsüw. Cos sitiül amix omeajtsüw wüx minajiütüw nejiw, aag ayaj ngo mambeol icon nicuajind.

<sup>18</sup> Itüniün ocueaj Teat Dios mambeol xicon, cos tanaámb sandiüman narangan leaw apiüng Teat Dios, nayajcan najnej tiül ximeajtsan wüx cuajantanej leaw sarangan. <sup>19</sup> Alinomb sasaj icon metüniün mambeol xic Teat Dios para ndom namb najaw icon najen.

*Ndójwüx atepeay, teamasaj Teat Dios mambeol nejiw*

<sup>20</sup> Nganüy satün ocueaj Teat Dios, aaga neech icoots majlüyiiüts najneájan, leaw tapacüch alinomb Miteatiiüts Jesucristo. Nej nganüy nop natang nejiür icoots, atnej nop nejiür sap ajiür misap nej. Nej ajlüy wüx aaga jayats poch leaw apmajlüy meáwan nüt, cos taw miquiej nej tandeow. <sup>21</sup> Ich mambeol icon Teat Dios merangan palan leaw andiüm nej, müüch icon merangan najnej,

cos Teat Cristo apmambeol icon. Nej netam marangüch casa meáwan nüt. Amén.

<sup>22</sup> Satün icueajiün xecojow xechijquiaw, inguiayiün leaw lanasaj icon tiül aaga nawiig cam, iyacan wüx imeajtsan. Áagan acas poch sarang wüx nawiig cam ngome xeyay najal. <sup>23</sup> Nganüy sanasaj icon aton, michijquiaats Timoteo laáw tiül manchiüc. Sitiül nej mapeay najen, saleamban quiaj najawan icon.

<sup>24</sup> Itepeayiün meáwan natang nenajiüt tiül icona; aton itepeayiün meáwan monyar andeac Teat Cristo. Leaw aliw ningüy monaw Italia atepeayiw icon aton.

<sup>25</sup> Teat Dios tanaámb müüch icon mimonajneaj nej, tamtámban. Amén.

**Jayats nanderac wüx miteatiiüts Jesucristo**  
**New Testament in Huave, San Mateo Del Mar**  
**(MX:huv:Huave, San Mateo Del Mar)**

copyright © 2009 Wycliffe Bible Translators, Inc.

Language: Huave, San Mateo Del Mar

Translation by: Wycliffe Bible Translators, Inc.

Huave

huv

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ikoots (Huave), San Mateo Del Mar

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 21 Feb 2024 from source files dated 29 Jan 2022

03b08bf3-6708-5491-84af-10b8e34eb51c